

四庫全書

集部

欽定四庫全書

集部

章泉稿卷一至三

詳校官庶吉士臣吳烜

總校官舉人臣章維桓

校對官檢討臣張位

謄錄監生臣李著

欽定四庫全書

章泉稿卷一

宋 趙蕃 撰

五言古詩

鬱孤臺

合水自汀庾更時閔漢唐鬱孤居聳特望闕漫更張層  
臺吾家復壯勢江右望舊遊那復省老至增悲傷里巷  
盛人物登臨多發揚士人皆孫李必誦蘇與黃不但山水  
窟自是仙佛鄉扶輿淑氣鍾寧謂接遐荒歷訪愁重

跼再來期裏糧懸知耳目接故與聞聽詳

發溧陽

久客問歸津如鳥脫網羅日夜數去程未遑卹其他殷  
勤謝故人送我山之阿舟轉岸亦移青林隔坡陀

弋陽道中

霜風不成霜雨雲復為雨溪山誰舊遊草樹得新趨蓬  
牕遞明暗客枕隨仰俯老子政哦詩諸兒貪賦芋

弋陽陸行

細雨濕籃輿渺渺穿翠楚林園知秋近已作西風語昨  
朝汗浹背今晨冷侵膺感慨悟乘除人生幾寒暑

八月十二日發潮

來猶念衾裯去已謝締綌浮生幾寒暑大半是行役長  
安冠蓋地難著山林客雖云住連月歸夢無廢夕扁舟  
落吾手舊路漸可識迎潮初蕩槳晚日旋挂席如魚離  
羅網如馬脫羈紲回首釣臺高淸風明可揖

枕傍有杜集看其行役諸詩有感復書

既將取詩名先應歷詩窮不見杜陵老飄轉一世中世  
學汝不嗜而顧思此工豈惟人汝憎造物且見攻無須  
歎苦絕甑倒與囊空

除夕古體三十韻

疾風鏖夜灘古木撼石壁漁火暗復張隔江哭聲接哀  
哀或到明語細雜嗚咽我舟若孤鳧欲去意轉繫終宵  
炯不眠殘紅照孤泣舟人吁且言今夕乃除夕官何自  
苦甚兀此六尺簣城中知舊多市工燈火集朱門酒盈

樽高會馬喧。櫪一飲滌千愁。共送殘景急低頭。更堪傷  
正此坐鍼席。去年臘盡時。家寓金沙磧。身雖隔劍機。母  
在猶戚戚。賊風吼西隅。百日走荊棘。一鳴嬰禍羅。轉翅  
千仞逼。母憂兒不歸。兒歸母已歿。沒身無以報天地。終  
罔極。永懷荼苦心。沉復對節物。今將萬里歸。機會不可  
失。丹旄倚江村。百里莫相即。弱弟奉齋燈。孤女想在側。  
夜夜夢慈容。枕淚迸膈臆。死者遙相望。未得就真宅。故  
山春事動。展敬遍丘域。松釵挂紙灰。陰苔藉芳列。那知

藁殞寒古佛伴蕭瑟魂魄無不之吳蜀雲萬疊國步尚  
憂危家難更堪說江湖多紅巾鄉關斷消息曼聲一長  
哀山石為我裂

為施衢州作超覽堂詩三首

浙西水平遠浙東山偃蹇使君是中人曾次極收卷矚  
舟固佳處超覽更勝踐智匠一何深天藏一何淺  
為州古云樂今蓋異昔時看公振規模於古端似之乃  
知用有餘如體運四肢苟能盡此道天下何難治



我評信安士無若捧檄孫政如賣卜嚴勢屈蜀郡尊堂  
成為公記賓主不在言更有夢得句真成壓璵璠

謂毛平仲

劉凝遠

宿玉觀次斯遠韻

觀去鉉山五里

吾曹骯髒姿共此高深趣要休車馬罷豈為仙佛駐紅  
蕖照階除翠竹森庭戶今夕且幽期明朝尚征屨

題蔣伯玉作白玉山創亭於廨舍之後榜曰望  
雲思其親也因賦十韻

蔣侯家荆溪曾次飽空濶一官寄楚尾常病登眺窄有  
酒無地把沉助詩句活規模作危亭更為思親設安車  
義時來歷覽吳與越俸廩雖云薄采菽水可啜我實通  
家子此意敢自別願同竹馬兒就彼上壽列豈惟一門  
事獷俗坐可革長使是邦人指亭記所發

同陳嚴倪三君飯素琴於延真觀嚴置酒要余  
至其家倪陳與焉酒未竟而使客至余亟引去

明日作此

聽琴訪黃冠置酒煩好事邀我過其廬二子相與至開  
囊出書畫黃李可人意蕙梅妙疑神舊識子揚子水仙  
初破顏縞袂亦啟齒婆娑哦其間二子俱徙倚杯行畧  
數計共約到壘恥忽聞古連村絡繹催我起有愧孟浩  
然業飲故恤是

和答斯遠因梅見屬三首

梅時寄我詩梅月方能至迢迢隔三湘莽莽非一水褰  
裳欲何之浩蕩正如此

窮居君勿厭窮途我何之初心欲求免卒志還累飢  
溜果何向命也將奚為

君行過海門惟復仍舊里友朋不易得相與況能爾  
獨念吾家姪無由從夫子

十一月二十三夜通夕不寐為賦梅詩且懷斯  
遠成父友弟及五首而曉書呈在伯

年年賦梅詩不賦如有關於梅亦何事我好自渠結  
昔人思故人往往託風月我今故人思因梅念高節

我欲賦梅詩詩故未易作勁質攘冰霜高情傲丘壑  
如應時清殿若羞世濁陰伏陽乃升此物方濯濯  
我欲賦梅詩佳處不自呈老樹賞空曠長條貴疎明  
既如幽人幽又似貞女貞可聞不可見可見不可名

婆娑風月隅窈窕溪山宅林園故幽幽鷗鷺空脈脈  
雖云有逢迎未易相主客桃李自成蹊歲寒知松柏

名園多攀折野樹多零落零落夫何恨攀折適為虐  
山居老莓苔竹徑無鎖鑰何當歸去來有弟同斟酌

在伯沅陵俱和前詩復次韻五首

暇能頻相過間或終歲闕寧將數疏論自有綢繆結高山  
與流水清風及郎月花且事深期人能廢明節

梅兮何等花意似幽人作芳不待三熏勝自專一壑屈  
原語醉醒孺子歌清濁醉如糟可餽清亦足可濯

班左昔成書幽秘或未呈孟堅得師古征南傳丘明維  
昔西湖花人孰知其貞自非處士句世亦安得名

愛山驢倒騎愛竹種借宅是能寓吾神夫豈有斷脈平

生江南春老去荊州客生徒歎飄萍死乃悲墓柏  
二君思飄飄獨我意落落博乎猶賢已謔兮不為虐是  
中有關鍵未易輕啟鑰至味匪鹽梅舍古復奚酌

對月

平生喜臨風今夕愁對月月好若愁看寒苦侵肌切豈  
無一短褐自不生暖熱想像水樓禽凍羽難拍拍

聞春

我居田野間糴米如賃傭晴天得曬暴雨日還燎烘晝

役薪水事故嘗多夜舂簸之有餘穀再以瓶壘充時時  
付手碓玉粒勝腐紅三年食官倉塵土填腹胸歸乃值  
歲歉半救了不供餬口於四方指困其誰逢啼號蹙遠  
耳夢寐深有攻官遊竟何得不如學為農水旱縱莫逃  
穠蒙年會豐因聞村舂聲竟曉成噉噉

訪梅仙宅

山林宣真遜江海詎忘君乘傳既良已變名誠有云遺  
風故凜凜異教莫紛紛尚有十年臭千年寧廢薰蓬蘢



暗成徑樹林深擁門人言舊宅是亂絕古碑存渺渺烟霞趣蕭蕭風雨昏何從覓遺蛻但可賦招魂

同見可過書院

遠山來釋雲近山復垂雨清風颯然下吹落何處所雖為湘中客湘西不屢來晨舟冒雨過晚櫂乘風迴看山亦何有要落漁樵叟我雖甚愛之可暫不可久吾弟之於畫逍遙殆能事好作渡湘圖他時寄離思

次韻斯遠同過智門茂草之中獨剪春羅花炯

然

山客城市役故人雞黍情懷我舊隱地偕為蕭寺行草  
茂既已合花孤遂能明看渠色彌正寧使城為傾君詩  
如蘇州真足繼善鳴我乃愧野格從教哂薄輕

謝文顯老丈見過

茅簷冷如水落葉堆不埽林深日上遲近午猶未冒忽  
聞咿啞聲籃輿遠來造兒言此何客貌古玉色膏心知  
定夫子躡履仍著帽我居甚荒僻好客鮮能到自非金

石交性不移濕燥誰能忘崎嶇於此修風好貧家難泰  
窄菜甲僅可芼屬君又止酒何以相慰勞寒牕數日款  
但有相交導我姿雖不敏敢不期勉蹈滔滔流俗中往  
往皆媚竈者君閉戶志有力甚於鼻衣單食不足恥以  
饑寒號曰吾道當然尚友古人操我雖因事歸未免斗  
食耗而君辱與遊何殊渭衝潦窮年語未卒迺以將歸  
告半百顧非遥驅羸行往報

呈嚴造道主簿

漫刺不待投數面自成親對言或無味況乃詩筭新佳  
處在阿堵小異果此君我行蕭灘上所食楊與陳百藥  
及壽玉磊落俱可珍今又見夫子此邦何多人一官二  
十年鬚髮頗費耘得非坐詩故造物主怒嗔如我亦復  
然此理又奚云一見互興歎响濡胡足仁湖邊雨新足  
荷背白勝銀是中何以思何當並車巾

過曾相士所居因題

見君每塵中訪君每塵外茅湯煮仙方茗椀出新焙溪

亭不難作軒樹茅為蓋面識欲何如臨流烏白背

因送客過六叔

荷衣綠破碎稻實亂撐拄秋悲空多風雲重乃不雨黃  
花已成昨白酒真漫舉小作談笑期暫紓追送苦

雨過壽岡先生

煩濁不能勝自知為雨候俄然落疎疎頗恨殊不驟款  
門執戟家竹樹密以覆書幃與書帙晚靜乃移晝人高  
固莫企境淨不受垢飄零歲時隔邂逅頃刻叩明當復

告別使我心如疾何以壽先生歲晚松柏茂

徐審知置酒會者三人以為此春酒以介眉壽

分韻作詩蕃得介眉字二首

紛紛春來華渺渺動行邁浮川向吳會走陸轉江介酒  
勤三醕爵禮重百其拜既慰推遷悲亦勞驅馳債

餓死因細腰半額由廣眉是知風化速有類形影移時  
人走功名我輩陳詩書雖病勿是疾雖貧勿自悲

既過曾居因訪劉茂實秀才是日明叔同出恨

仲威不至

官身肯聽俗人事直強親開牕對脩竹筆墨得具陳俗  
子有時來揮去防怒嗔相看久不厭陳子清且真昨宵  
一雨餘村村農事新我亦思駕言出門免衝塵是邦亦  
有園以鳥視其人寧從窮巷居鷄犬喧四鄰劉君方授  
徒曾君說人倫室屋不尋丈猗猗幾長身未嫌酒杯薄  
政愛茗椀醇曾君索我詩出語愧逡巡煩君隸書題筆  
意堪嗣秦春遊有如此省費能全神但恨子胡子招要

不能頻

送莫萬安

西江十一州我所歷者半紛紛墨綬徒十有九頑懦使

者金閨彥

謂運使趙公子直

用意人物中見我輒詢我稱旨不

數公

時併朱廬陵致知王南昌中復言之

我時官白下與公未相識何以

知其然鷄犬相接迹無何困流轉卒歲下風趨看其日

所為自喜言不誣人皆竭民脂我獨求民瘼上官雖喑

鳴民氣得和樂體用夫何如動靜惟以誠夫豈今人歟



古人斯與并朝廷重縣令不減用儒盛六察與郎官遷  
除匪他徑公行始發軔九萬當自茲侍從近臣間沉復  
多已知

送交代吳共叔師禮

往君在太學有類如何蕃仁義積諸身諸生知所尊今  
君為主簿又類習鑿齒不仁荊州士四海名未已誰云  
斗水渾可養橫海鱣澗壑雖阻深松檜能參天羣公頃  
爭薦亦既陞初秩似君許人物豈計一階級聖朝開文

館政為時育才似君此風骨咫尺斯蓬萊而我獨何者  
瓦礫偶居後縱加刻畫工未抹無鹽醜古人重交契今  
人顧不然願君保金石勿為燥濕遷飲君一卮酒屬君  
千萬壽更欲挽君船江頭已無柳

送沈沅陵

世官古所譏世祿今不廢要之苟有人二者非苦背君  
祖我曾祖紹聖同廷對素風我莫嗣清德君可輩江湖  
渺聞名荆蠻適親誨忘年君固美並行我終悔許以相

唱時何止聞磬歎君行竟先我後會何時再江花與江  
草頗恨遠目礙君於門戶責有似松栢耐而我詩書樂  
政爾羞同隊臨分曷告我苦語幸勿愛我亦安贈君結  
蘭以為佩庶幾二祖風歲久端如在

與叔驥父子別後悵然懷之三首

君家茗雪間吳楚夢莫續茲行得所未到處須著目平  
生胷中奇於此不容縮江山雖云生詩句何妨熟  
遠齋老於文立語更造極為我寄竹隱深意遺筆墨向

來說山林俗眼多見白是公不吾呵可謂計之得

客中得君來念我忘偏仄君行竟先我未免為此別自  
憐性多忤每負朋友責如何君父子相與獨無隙

子肅示九日山谷間懷兄弟三詩因懷子進子  
儀次韻併呈子肅子進客常未歸子肅子儀在  
懷玉山中故及之子肅昆仲出示游懷玉山詩  
蕃不同行無緣屬和謹成古詩少見嗟嘆之意  
聞儼上人方集山中故事當併授之

我為懷玉人不踏懷玉路非因訪仙懶自畏觸嶮去聞  
君兄弟往勇決不少顧念將攝衣從欲行却回慮人云  
山峰高白日蔽烟霧況方迫窮冬我褐猶未具雖欣陟  
幽遐政恐成疾痼以茲不暇遊心與飛雲遡君還得新  
作快讀喜莫喻上言道傍見次及巖下趣恨無龍眠手  
按此攄毫素昔君家興公曾為海山賦至今斯文名殆  
將壓彪固淒涼禪月蹤牢落高人住得君為著眼草木  
應亦豫好事儼工人方集山中故併當收君詩在在神

物護

子進游懷玉山度必有詩未辱寄來作詩索之  
秋日清且美於游也固宜迨今冬已仲瑾戶惟其時若  
人興公家嗜好夙有詩幾譚巖壑間塵落不自知靡辭  
陟降難顧病風露披舊聞懷玉山地置多側危我為是  
邦人每恨著脚遲聞公勇決往身住心俱馳是邦有茲  
山蓋已千祀垂曩者尹夫子謂少稷名攜家隱於斯與山  
結勝因詩成多及之去年公二仲探討曾至茲今公又

繼去祕密真無遺山名謂懷玉自昔傳我疑衆作乃圭  
璧名實信不欺書來報行程快讀祇欠詩春膏有餘否  
公自造之紙佳筆銳若錐會當寫真行寄我光茅茨

有感

食肉固可鄙枯腸合搜詩旁觀聽平亭蔬筍同阿師涉  
春擬辦多才盡不自支頰也能苦吟玠體憂素羸看花  
輒有感袖手增愁思

枕上有感二首

霜月有餘照風燈無停光客夢一何短鄉關一何長拊  
身念艱虞失足增傍徨平明攬清鏡鏡鬢髮應成蒼  
我欲學為農力耕不逢歲我欲學為士儒冠多餓死誓  
將棄犁鋤亦復罷書史長隨馬少游浮湛自閭里

感懷五首

新霜迫人寒落葉無停枝長夜不得旦四壁崩莫維牀  
根蟋蟀親幽怨如陳辭感我平生心搔頭半成絲  
木落無著葉枯林多悲號饑鳥不得食拾樵護遺巢居



人寧知悲客子中心焦故里一回首山高水迢迢  
多病成早衰憂苦相與并嗜書不自知欲視忘其盲平  
生金石交夜牕短燈檠幽焰吐復滅花寒終不榮

短褐不禦寒哀哉不言貧遠客自多感況此霜露晨惋  
彼籬下菊粲粲晚始新餘榮何足恃枯槁同荆榛  
我生天地間亦是天地民造物苦見欺輕薄隨時人抱  
道鄙富貴徇勢陵賤貧聲名自青史骨肉終黃塵

連日昏霧感懷

窮山逼窮冬苦霧作苦寒舉頭不見日  
況乃見長安朝聽樵鼓微午聽庭雀  
謹占晴復畏雨有抱那得寬少日  
謬學詩中年癡覓官擇術不自審  
終焉墮艱難妄營三徑資輕舍陋巷  
簞胡不返故步無為學邯鄲

懷斯遠

前宵雨浪浪昨夕風浩浩相逢固歡喜  
相去復懷抱聞牕酒自引敗筆詩試草  
引酒願詩成詩成醉而倒

夜坐懷子肅子儀

寒燈耿書牕，槁葉鳴竹屋。懷人在咫尺，令我嘆幽獨。難  
兄如大蘇，令弟優小陸。未容侍明光，端合校天祿。如何  
衫尚青，或乃袍更鵠。又疑致遠大，無事計淹速。不然被  
造化，寧忍恣顛覆。如我辱交友，蒙顧等骨肉。三年且過  
半，良晤可不促。要將倡時詩，盡用首尾錄。我曾泛荆溪，  
君亦訪懷玉。他年三人名，定載圖經續。

秋夜懷彥博審知

山深月吐遲，亭亭夜向殘。露氣挾與俱，侵牕迫人寒。團

扇甫罷去布衾已覺單儻無寒暑期何以彫我顏人生  
七十稀俯仰半已闌隱顯兩無得永懷那自安不能躬  
灌園而顧學彈冠不思行所易而獨務所難王徐兩玉  
人結髮棲儒冠徐詩壯城壘王筆長波瀾出從舉子遊  
隋珠供雀彈得失何足道如博資衆觀念欲與子談衮  
衮非一端符移苦見催行色不少寬十年山林靜一朝  
塵土干足雖未出門歸興已浩然溪頭楓變赤籬下菊  
且斑客居豈無酒遲子一跨鞍

懷徐審知王彥博審知之姪彥章

為見山花發忽思湖柳深當君散帙坐著我倚樓吟別  
句漫多紙別腸終欠斟光陰幾尺壁書疏闕萬金病駒  
匪戀秣鴻雁歸有心已後蘭亭集猶能與竹林

有懷二首

桑落黃而隕於飛雁翱翔豈無同心人滯彼天一方劉  
氏賢父子好古俱志彊向來文墨盟許我由升堂三孫  
子荆家人物妙過江當時載酒地朝暮一玉光幾年斷

行迹老柳知在亡苕溪到荆溪一葦可以杭定應數相  
過我顧不得雙屬謀吳會行秋瘡冬尚僵迨今病小愈  
又值天雨霜饑寒苦見驅此役殊未央苕溪道所見有  
宅非他揚我猶識其門寂寞羅可張會成整衣冠牀下  
拜老龐退從阿戎談麈尾飯不嘗獨說孫之居更下荆  
溪傍慨茲如許別肯憚一水長孤蓬不難遡物色因鳴  
榔儻聞葦間音躡履斯迎將剡曲笑徒反竹隱聊與當  
古人有成言居必思擇鄉我今落殊縣絕交類嵇康論

丈得重與近作期倒囊從遊不徒然會合沉莫常匪但  
難泰約要資藥石良鍼砭苟不靳我何懼膏盲痿盲於  
起視頃刻未始忘陰風忽動地暮色自遠蒼歸尋短燈  
藥依舊平生牕

憶我官白下梅藥破臘前維時初識君共呼江南船我  
作七字句君答如倒弦自茲三年遊如筮復如壘中間  
雖契濶會合踵不旋東閣坐明潔意釣行方便快閣誦  
長句觀山酌幽泉別來歲云暮書札迴莫傳客授比安

否曾氏稱好賢況乃我畏友於君寧間言生涯富黃卷  
代寶餘青醴酒色湛若空弟兄皆璧連吾事豈不濟寧  
當論歲年日者大雨雪我行政金淵朝躋遍田野夜夢  
惟江天梅花且復開雪屋鳴溜懸思君不可見使返徒  
帽帽

秋懷十首

秋林如老髮臙好忽已衰委身造物中寧得追厥時木  
落有再榮人衰無少期可不思自勉無聞戒在茲



我生不敏姿求友富三益向來或晨昏今乃限南北悠  
悠江山念耿耿風雨夕以我思渠心渠能不余憶

平生迂齋老雅志在考槃塵氛小敗意顧輒求辭官谷  
中萬松株鬱鬱知歲寒茯苓儻可掘寧用菊為餐

寒溫問虛名杜老厭束書半百無一行又似計數疏儻  
非奉子公不妨問何如因聲遇齋叟簿領想多餘

茗溪在何許水遠山幽幽自聞遠齋亡時序忽晚秋尺  
書不能寄有懷空淚流何以諒我心諸兄交白頭

吁嗟古詩人達少窮則多定逢造物嗔故此成折磨懷  
哉興化令纍然蓬一窠融州計官滿歸日定如何

侯芭老於玄後山稱嫡孫師法苟自是顧可名他門欲  
觀尹方齋請視周伯仁我亦識此老一尊思細論

吾友王彥博結交二十年早孤能自立不待孟母遷鄉  
閭固多士如子蓋少焉祖述端自誰書有太史篇

吾友徐審知識自弱冠初中間幾離合每見愧不如迺  
翁春秋學老死使者車官職不足道門戶政要渠

情親骨肉均未可一一數君家蓋其人進也邊城戍肅  
儀雖近家白首猶管庫好歌歸去來莫賦感不遇

雪中讀誠齋荆溪諸集成古詩二十韻奉寄並

呈吳仲權

雲埋懷玉山風斷羣玉府霰聲歛成跳雪陳翻已舞槎  
牙聚瑤林突兀森瓊戶山差丈人行鳥絕兄弟語初者  
失南東旋覺迷仰俯恍疑羣仙下直謂陰靈聚回霑鬚  
蕭騷細著衣縑縷履穿不能曳筇凍莫可拄書牕偶朋

會詩冊隨意取誠齋入諷詠思隱記稱許甘能膏齒頰  
清且醒肺腑詎須割蜂房底用煎茗乳非惟雪花同又  
並梅花嫵調孤匪相寒法凜由思苦想應當此時有句  
肯易吐平明入賀回馬向章臺拊過午下直遲手映玉  
柄塵同僚有同社久已齊白甫長別漫長懷何因似郊  
愈風引故能親雲披禽先覩

晨起雪作

苦寒不成眠哀哉何時旦擁衣聽鷄鳴有類巢木鶴牕

明若彷彿自起尋宿炭殘爐星銷盡束縕分鄰爨頻年  
慣羈旅未省今日歎為生乃至是可復一笑聚陰風忽  
悲吼出戶雪欲亂所恨梅未開不得爭璀璨

連雪偶書

初雪為歡謠再雪猶喜視三雪已恐多四雪翻為異坐  
樓漏明屋卧擁如鐵被蕭條市無行寂寞門半閉官居  
且云然野處當何似凶年畧無儲度日唯旋計糴粕有  
十百糠覈匪一二葛根藉長饒蓼草同滯穗哀哉當此

時已矣良不易仰頭叩皇天俯首蹈厚地天地豈不仁  
冰雪行且霽春膏動土脈好雨趨歲事但勤力田科且下  
半租賜當思碩鼠去切勿厭狼戾

晨起觀雪

荒雞號何多鄰犬吠愈悍初迷紙牕隙旋失布衾暖呼  
童戶先啟走報雪且滿為言果羞明若爾真待伴須臾  
起孩稚次第及衰懶索衣亂襦袴取酒忘濯盥試觀尚  
零落騁目迷間斷青黃倏衰白陵谷置平坦灞橋欠驢

蹇剡曲無棹短有興不可乘  
攄詞詎能誕

九月十一日雪二首

九月天雨雪何曾見南方我行蔣山來解轡菩提坊一  
飯誰為設百錢倒空囊平生遠遊意到此增徬徨勿厭  
在家貧輕行更離鄉

寒風動地至有如窮冬時居人不知感客子深懷悲故  
山邈何許倏忽半歲辭行脚債未了悠悠遂臻茲舅薪  
且弗給更問裘褐為

七言古詩

寄題林憲景思雪巢

雪堂竟向雪中成四壁紛紛洒雪霏春秋記事有成法  
匪同風月徒虛名雪巢之雪竟何許豈象主人清且苦  
長鏡長鏡吾與汝詩瘦誰令如杜甫我嘗快讀誠齋賦  
凜凜風前留不住幾思從君借一牕細讀妙句令心降  
題沈臨江邀涼亭

昔我過此暑正薄是時此亭亦新作竹移不問醉與迷



柯葉一敷無病篠今茲再來毒熱新客塵昏昏能病人  
正思一坐此亭上駭俗寧待徵龍鱗世將大熱比酷吏亦  
以清風喻君子公涼何止一庭中寒露清冰遍閭里嗟我行  
色一何遲不及亭成分韻詩竹溪之逸故難著竹林之賢  
容可追

亭成之初臨江與楊謹仲彭子壽仲衡徐百藥蔣壽玉以不可使居無竹各分韻作詩

題喻氏萬卷樓

今人藏書務書多昔人讀書病書少藏書不讀竟何用  
歲老財供蠹魚蛟喻君命意何其賢藏書讀書兩相兼

有樓不肯貯風月名以萬卷非徒然我今百念空如水  
祇有耽書心未死為君作詩宜無意一鵠時送從茲始

題周袁州尊德堂

視其所以知賢否論世亦云當尚友宜春郡圍作新堂  
名不他求斯有取堂堂房公暨李韓文章事業兩不刊  
俱曾屈綰此州綬年紀雖遠猶班班淳熙中興公出守  
渺然獨繼三公後政成乃復作新堂亦使此州傳不朽  
江山雖勝何足稱風月之遊不在民未如考德接以道

視古所作書諸紳龍舒使君適來止吐詞為記甚瑰瑋  
徐州憶昔黃樓成少公賦屹班揚壘記終慷慨思蓋公  
平津東閣方亨隆分符與政兩如此天下寒士何憂窮  
我思作詩頌公政萬民有口人其聽矢為此章載厥德  
後之視今今視昔

招審知步月

三年不對溪南月況乃哦詩向君說前山落雨此地雷  
我自生涼人厭熱林梢雖復亂蟬鳴豈不大勝蒼蠅聲

市聲收盡浮橋寂要子同來作細行

舟行

夜來投宿定花浦迄曉占風更前邁波濤洶湧勢莫遏  
顧視吾舟真若芥是時霜威甚可怖篙師戰縮不可耐  
急溫濁酒澆肺肝向者饑寒人安在自憐不比婁師德  
未可輕犯垂堂戒徑搜苦語謝江神恐懼偷生勿吾怪

明叔同舟見別於永和

砲雲忽作空中起坐覺相顧移表裏兒曹厭靜欣聚落

數問篙師行幾里人生到處如燕鴻  
南北故憐無定耳  
有時相與說舊遊  
此味猶如蠹書紙  
秋風日夜催落木  
我鬢半霜那足倚  
沉堪忽忽新悼亡  
忍並高山對流水  
陳侯於我四海人  
氣合能同舊州里  
向來風雨嬾出門  
今乃江程勞玉趾

送吳叙浦

生年月日雖則同學而聞道莫比蹤  
學而聞道胡不庸  
咎且不免寧論功  
一官俯首蠻貊中  
幾年積獎頻年凶

去姦植善扶疲癯我所目見非聞風孰持黃詔來自東  
謂君違天合君衝天家誤聽州家謬歷計月日曾未充  
使家熟視州家惜萬里君門誰為通學而聞道要有用  
達豈吾泰窮何窮君之授受遠有宗湘水浩浩湘山雄  
龍門當日謂不遇尹楊亦到明光宮

送徐孝章並屬光庭

儒冠往往令人羞夫君經明行益修豈惟吾州罕此流  
他州亦復難多求邇來默默如有憂君其莫遣胷次留

是物能為人贅疣不但蕭然成白頭閩山重行歲且通  
梅花落盡臘酒稠茅簷夜氣侵征裘一杯頗解思人否  
君家大阮真吾儔許君能從竹林游福清政成早回輜  
飽食相期趣麥秋

撫州城外作

城中一雨僅飄灑城外此雨乃霈霂分龍古語信不妄  
不爾惠施何偏方我行驅車一何忙早起猶乘昨夜涼  
舊聞既雨晴亦佳豈但蕙葉蒙寵光早禾已秀半且實

晚禾已作早禾長不惟稻隴有佳色菜畦苗葉相與昌  
園丁採擷入城市不用滌濯臨滄浪我雖無田豈無圃  
歸計不決空傍徨翻憐買菜糴占米烟火薰人官道傍

次韻斯遠聞蕃移官岳州見寄

西南之役凡幾州行行不已茲登樓幾懷佳日悵日暮  
誰謂澄江驅客愁巴陵洞庭故勝絕李白杜甫曾漂流  
亦思著句道所以語不驚人空白頭

書紫微集後



詩家初祖杜少陵涪翁再續江西燈陳潘徐洪不可作  
閻興晚許東萊登遺書散落亦已久是編頗得十八九  
景公千駟何足云伯夷垂名端不朽

題王叔毅畫

乾道八年歲壬辰秋旱冬十二月八日纔微  
有雪意晚復快晴予時將自玉山還章泉山  
居秣馬且行湍石俞季揚以此畫二紙示予  
云臨川王叔毅所作也予即折簡問名於晉

陵孫子進子進以欲雪弄晴名之季揚令予  
作詩予且迫歸有所不暇季揚強之以俱道  
間無事欲為下語而耳目所接率如畫者自  
惟詩材素孱而又厭以此境若勉有所作亦  
何能工遂書八句聊記其實不復加槩括也  
天公知君有此畫要遣題詩與當價故令雪還弄晴  
盡日神機不容暇毫端自出右丞維孫郎一見欣得之  
寫真命意兩俱盛我今落筆胡能奇

反舌

卧聞百舌鳴春風起睇簷間惟見一自驚夫豈鬼神歟  
久立恍然神未釋人能化鳥舊所傳斷以不疑因杜鵑  
爾今變化自何物儻匪敗家由敗國

梅花二首

折來纔見開三四但覺槎牙亂經筍遲明已復吐六七  
頗怪鮮明侵竹隔多花璀璨固可人疎花的樂意適真  
固知此物無不可風月婆娑仍著我

山礬水仙兄弟數姚魏稱君真僭取三國人物誰可許  
大兒僅得孔文舉我家遶屋碧玉椽下有獨樹爭蟬娟  
平安無使信莫傳疎枝冷蘂空淒然

梅花用東坡惠州韻呈子進昆仲

春風未著江南村梅花有方先反魂  
爛斑初疑霜集曉爛漫忽若月挂昏  
孤山寺下林逋宅松風亭前東坡園  
想應照水自愁絕誰復好事來相溫  
我今居間百無念夜半始寢起及暇  
欲拈墮蘂每攀樹要看落影長開門

東南文士推諸孫妙處不在工語言要於險韻出奇峭  
敢云小技未為尊

歸計未成不勝家山之思用元明山谷唱酬韻  
寄成父

近來多病不飲酒少日興酣那計觴當面背面從譽毀  
覆手翻手分炎涼老冀伏櫪志千里壯士悲歌泣數行  
故里悠悠無遠夢寒猿歷歷斷人腸

周文顯之子來過因斯遠過余於智門相與坐

於遺愛亭上書所見附寄文顯

仲冬六日如春旦偶向溪亭適吾倦山耶雲耶遠莫知  
但見青蒼屬仍斷其餘雜樹亦稍稍復有深溪臨斷岬  
謂言雨後當有梅倚薄敷叢忽陵亂一杯共摩石田甘  
走筆題詩待君竄因之併寄伯仁君儻肯來遊驅款段  
再用韻呈斯遠

與其紛紛評月旦孰知黃妳寄疲倦夫君忽來語不休  
政使風吹吹不斷我歸政泊水之南君往適當溪北岬

有時浩歌送激烈却恨中流驚鴨亂看君鵠舉且鴻飛  
而我孤奔仍鼠竄終焉豈有尺布縫其價可值錦繡段

懷趙蘄州文鼎

吾州憶當南渡初居有曾呂守則徐本門林下亦此渠  
往往詩流非酒徒邇來流風頗寂寞南池二公也不惡  
李今作舟大如斗公更蘄春方待守幾宵春雨落連明  
南池水滿春草生不知春興凡幾首寄我因之報安否  
彥博許見過不至

高軒數許過三徑日云暮矣殊未來湯熨病人狂欲  
走戲作冷語成優俳歎思官池頗空閒況有水花明晚  
色人間咫尺方蚊雷植杖裴回須月出

大雪

長年南雪不到地瘴癘慘毒愁北人今年初見臘前白  
寵光併與梅花新客居破屋愁欲裂病目不嫌熏濕薪  
鷄衣百結不散膝戀戀誰憐范叔貧

二十七日復雪用東坡聚星堂雪韻禁物體作



詩約諸友同賦

溫風忽來振柯葉翻覆手間重變雪天公作事豈容料  
坐使南人驚曠絕朝來送客到江潯凍骨凜凜吹欲折  
歸來席戶已迷漫芋火撥殘灰沒滅眼中所歷要摹寫  
拙筆難書非被掣叩門好事忽有餉一盞徑能生臉  
頰昌黎咏雪故雄健取喻未免收瑣屑爭如歐蘇兩仙  
伯一白解遮羣醜瞥我今因客乃自困韓非說難竟死說  
戲詩還與作官同大錯知合幾州鐵

十一月晦日欲雪

九月不雨至於臘北風忽來吹作雪竹頭搶地何肯低  
梅面著沙終自潔書生好奇甘忍凍屢起推牕探雲物  
雖然亦有過計憂憂怕水仙重蛻骨

雪中過在伯

北風一夜吹成雪城東城西人斷絕冒寒客有晨獨起  
不畏風吹骨欲折烏薪價高瓶粟竭妻子亦作異縣隔  
微官本為饑寒計到底却如生事拙奈何曾不此為憂

政爾發聲歌應節豈惟入地絕遺蝗便想連天搖宿麥  
寒廳逼仄礙眼界古岸寬平可車轍寧能不見戴安道  
我無逸興須渠發

卧聞

卧聞急雨吹風顛吾家泊船若箇邊此懷自足滋白髮  
沉復哦詩渾廢眠欲呼杯酒慰枵腹童奴告我尊空然  
夜坐

竹風疎疎雨打篷松風湯湯水赴洪道人聞塵掃未空

不如杜老前月聾山齋夜坐僧跌同團蒲細軟方爐烘  
燈花開落縱忽忽我今無害斯無凶

連日風雨有懷沈仲良歐陽全真

滿城風雨重陽近此句豈惟時節詠古今凡歷幾詩人  
獨覺柯山有餘韻臨川之謝東萊呂往往懷潘用茲語  
我嘗評此七字句政似江邊烏臼樹去年此節雖淒涼  
和詩有沈與歐陽今年愁絕不可道三人各在天一方

章泉稿卷一

欽定四庫全書

章泉稿卷二

宋 趙蕃 撰

五言律詩

立春前三日雪明日猶未已詩簡子進彥博昆

仲示成父四首

稍稍因風集蕭蕭與霰俱山明一笑粲竹重折腰趨白  
戰慚非敵清譚孰可娛無庸杖方竹隨懶坐團蒲

應候猶當臘爭先未得春人貧只如舊天意欲呈新盡

洗江南瘴全消渭北塵能逢中興日甘作未歸民  
衾冷方高卧窓明誤攬衣問梅穿破履借米啟柴扉曉  
日猶藏密和風盍解圍冬春俱正令寧復病年饑  
待伴先春至差明積夜初空庭戒無掃凍筆屢成噓溪  
遠應回棹窓明好讀書惠連臨此際題賦復何如

正月六日雪

立春纔十日春事已交加政苦詩材窘欣逢眼界賒漫  
天皆柳絮何地是梅花無復青帘覓敲門問酒家

正月十三日過鄧師契邂逅伯山在焉師契置酒因成五言四韻是日閱南軒諸公帖

竹已連梢種梅應帶蒂栽因畱看書帖更辱倒尊壘勝士亦俱集好懷端為開春風不拘束兩鬢自摧頽

正月十六日雪

竹屋偏宜雪江亭更受風一杯時自酌五字不須工柳色全然未梅花半墮空東江雖可住吾志在江東

二月十四日發潮後作

歸路今無幾春風半已經潮回知所遠雪積見山青問  
欲從漁父明當訪客星未須傷傷及那敢怨飄零

文顯兄弟見過

東郭有二士閉門甘一簞貧非原憲病詩豈孟郊寒俗  
子往不顧斯人交亦難若為能步屨相與轉林端

審知見過

吾廬非不愛計拙未能還坐我雲山表望君鄰里間  
疎成鬱抱纔見即開顏安得同三逕長年只閉關



施進之見過二首

君來能破悶而至更蠲愁舊識廬山道長懷鸚鵡洲相  
從今十載一飯未成謀俱作江西去君車我具舟  
鷺影投山背蟬聲滿樹頭千峰雪未釋四野雨初周甚  
矣厭餘暑欣然當早秋半年纔此見一夕可辭留

社日風雨

坎坎連村鼓喑喑隔墅雞雲低天欲夜雨合路平谿酒  
為治顰飲詩因排悶題休嗟妨杖履聊取便鉏犁

晚坐偶題

簷外歸雲遶簷前落照微  
牛羊知既暮鳥雀自相依  
積雨雖推陣餘寒未解圍  
何妨向僧火亦復蓋征衣

過欽止

一飯肯留我羣書容恣繙  
雨收還撼撼雲破復昏昏  
山水琴中趣桑麻野外論  
淡交真有味炎附卒成燔

再過斯遠

雨暗湖堤沒藤交樹色深  
兩來因問疾每至亦幽尋  
勿

謂年方壯須知老故侵暄寒多變節調護盍關心

寓舍書懷

還鄉一過年借屋兩成遷舊閣愛晚碧今居因地偏居  
然闕生理復爾辦行纏四十今如此修名後若傳

贈別歐陽全真三首

我尚長沙客君歸自五溪放舟知有日枉駕忽衝泥少  
慰三年闊重嗟千里睽交情故如酎薄飯不嫌齏

幾日暄寒候渾如到嶺南岑岑無藥療憤憤祇書耽雨

止隅仍漏鳶飛潦政涵君來得披豁萬里散晴嵐  
往者贛州牧與君鄉里儒身俱上黃閣官或伏青蒲薦  
口寧虛啓才名不可誣下僚如處士鯁論亦時須

書懷

倦櫛頭如葆深居心若齋作詩須識病遇事莫裝懷富  
貴乃身賤饑寒為道階長貧君勿怨天豈困吾儕

去冬過新喻得前四句因見全真行足以成篇  
雨裏過新喻風前憶舊遊淒涼孤鶴化寂寞兩羊裘屢

雪交游涕無驚鬢髮秋君歸應有感榮謝冬悠悠

溪楓

溪楓一蕭瑟溪柳四繽紛年事有如此吾生何足云登  
高欠能賦有感在斯文欲向洲前問哀音不可聞

詠鴈

胡為去關塞何事落江湖歲月常違燕飛鳴每候奴旅  
蒲雖足樂矰繳絕須虞矯矯其高舉紛紛莫下俱

對月簡全真

對月重茲夕吟風尚昔懷思君兼野水恨我局空階意  
嚮元相似言談自莫諧忽思成簡寄還覺費安排

鄔子對月

庭戶容才咫江湖見每賒秋毫渾可數纖翳不能遮頗  
念從此去還愁興盡嗟不如沽酒飲飲醉卧蘆花

過易簡彥從

雨從筍怒長春雨陰暗成關門有餘暇散帖不妨清從  
仕亦何好隱居無用名悠然會心處便欲寄吾生

教授知縣以釋奠宿於學宮輒爾奉簡

秋色肅已甚齋居清可知無由一夜話漫興五言詩祀  
有同王者居無陋九夷校官俱長吏不比判司卑

叔文見過且攜趙祖文歸來圖來為賦四十字  
蟬噪天邊柳鳩鳴雨外桑江東千里遠湖北比年荒  
畫展歸來賦辭吟老至將終焉莫陶寫醉帽晚風長

與成父夜坐

抱病俱不飲清言醒肺肝山空知室迴念靜失憂端縱

筆詩還作無弦琴廢彈菴居已清絕況及夜微闌

琛卿坐上作

負郭有佳處昔時來未曾梅高居竹表石瘦倚蘭層置  
酒能要我哦詩更得朋醉揮君勿怪明日弔溪藤

伯玉夜過因談西湖石筍峰舊遊用初三日韻

相識欣佳士常談厭老生湖山遊息處風月笑言情宜  
但沈疴愈能令老眼明無嫌數呼喚政爾一般兄

張伯永簡來云雪欲作而酒適熟尉又過之要



余同集

久旱疑為瘴晚風生許寒梅花逾孤厲人意絕荒殘漉  
酒能呼我知公故解歡平明如雪滿快閣上危欄

次韻王進之欲雪兼屬林令

雨集疑為霰雲陰驟欲開共嗟三白晚還是一年來令  
已憂民切君當著語催不應渾似我形槁亦心灰

欲再過子進昆仲舟人給以迷路既遠不能復  
也悵然懷之

數畝湖邊宅千篇海內詩機心謝鷗鳥樂事付墳荒艇  
子思重過流行竟莫知吾儕俱老矣悵望復來期

過從禮

崖壁怒開張盆山草木蒼高深類盤古瑣細亦禪房雨  
潤畫粘壁風微書散牀小留談不惡而我病成妨

過西峰主人適出回訪劉伯山不值云過黃永  
新也

佛寺興已盡隱廬來不賒隤基瀕野水瘦竹隱疎花試

挽添丁問云過叔度家清談固難覓渴肺頗思茶

夜過李商史

每見必匆匆談詩口不空林間驚落月坐上覺生風  
老大君無敵飄零我漫窮問年纔半百歸及未成翁

獨坐晚題

斜日欲向夕孤懷誰與開慵能繙故紙間且撥寒灰  
海內長為客江南欲放梅竟將身自繫寧有水西回

次韻歐陽全真過玉山見寄

祇道歐陽子行飛入道山報來猶佐幕書至得開顏過  
我不相見底忙成往還未知重回日端復幾年間

豐城送成父弟還玉山三首

溪上同舟送江頭獨步歸秋風方落木客路要添衣故  
舊詢安否形容話瘠肥吾行猶許遠爾去復誰依  
酒薄僅飲濕哥長欲淚垂人皆有兄弟我獨困乖離苦  
乏田園計初非干謁資途窮與計拙千載少陵詩  
調護山中竹斧斤毋使侵當門要移種遶塹合分陰詩

去慙如錦書來定抵金上言說兒女其次及山林

娛山亭

在太平州判官廨舍為大舅氏作

嗜好雖同轍賢愚本異岐簞瓢樂吾道錢馬昧真癡吾舅端何以名亭不在茲登臨如有得勿用語羣兒

訪白鶴山祥雲觀

白鶴空鳴鶴祥雲祇亂雲流傳因長老紀載未前聞步履欣逢勝題詩愧不文林園猶午雨墟落遽斜曛

燒浴昭真觀逢方元直誦僕舊詩

泉落千巖雨松鳴萬壑風徘徊豈人世清絕況秋中就  
浴能除垢催行覺未窮逢人舉舊句已似宿生同

賦胡達孝林霏五題

老樹綠相交新林翠裏梢童能奉巾盥客有問推敲香  
事身依佛炊煙地遠庖渾疑宿雨在不見曉禽朝

澗舖嶺

登山自不惡飛雪沉相仍照映慙非壁攀援笑引繩向  
來聞矻矻今日上層層可但長安道騎驢覓句能

散菴即事

屋冷頻添火，牕深遠炷香。  
荆榛白墮境，杖履黑甜鄉。  
晚日誰云短，閒身得暫長。  
畏人成免俗，治藥屢傳方。

東菴上方

地瘠不宜竹，山寒多種松。  
路窮千折險，菴在最高峯。  
石溜通泉乳，晴簷喧蜜蜂。  
客來僧不語，日暮自鳴鐘。

雨入丈七坳

信是長安遠，休疑蜀道難。  
千崖懸盡斗，萬石列皆攢。  
舉

足無非仄捫心每為寒不堪天更雨政欲助吾官

天雨助官

政坡翁杭州雨中  
督後詩也

投宿清福寺

落日迷墟落林霏隔樹林入門疑寺近出谷聽鐘深  
墜戶覓安寢隔離籬謀濁斟不眠還耿耿百慮攪予心

題龍州亭

亭自君家築洲從何代名諸公多好句老子敢爭衡  
騰欲危欄倚少須春草生毋庸為鱸去聊欲赴鷗盟



過上村菴二首

朶朶艷紅蕖叢叢映碧蘆  
秋風見池沼幽思發江湖  
愛竹寧詢主行山得當圖  
弟同仍子姪我友亦相俱  
秀色留金鳳餘芳在水犀  
日明能皜皜風急似淒淒  
野地猶飛蝶深林亦啼雞  
居間常却掃安步輟扶藜

懷甘叔異曲江菴寄叔異

夢寐曲江磯磯頭隱野扉  
朝笳驚鷺起暮屨看漁歸  
志士泣蘭芷高人甘薜薇  
悵予非所事樂爾謝塵鞿

書李氏園亭

坐久思行步因而上野亭日薰梅雨落山接稻田青何  
術銷終訟連朝役瘦形早知還走俗不用學通經

章塢菴

路盡庵才出雲深山更藏陂池新得水松檜舊成行午  
供隨齋鉢畱題陟上方林鳩方喚雨歸路恐相妨

寄題安福士人家賞靜軒聽雨二首

心遠淵明趣室虛莊叟書宅邊種柳樹濠上樂鯈魚往

者不復作斯人今則踈誰為賞靜者吾欲並門居  
有聽輒有感所關非所聞小軒渠對雨遠地我看雲大  
被清霜曉短檠寒夜分朝昏解同趣南北謝離羣

同俞公擇孝顯王彥擴譙子遊白蓮庵飯於東  
庵而歸

幽禽鳴屋角喚我起尋春山徑八九里角巾三四人側  
行松偃蹇倦憩石嶙峋誰道春猶早山櫻幾樹新

早出城

夜雨細無聲朝光快作晴空庭芳草合遠樹鶉鳩鳴無  
復知春處間來看水生不唯身暫適更覺眼增明

明日復出城

夜雨更連明籃輿偶出城田疇蓑笠事江海鷺鷥盟少  
小規微祿侵尋愧老生蒨蘭春渚滿桃李綠陰成

遊齊山

借馬訪齊山犇行不待銜舊來聞若渴今日嗜如饒故  
喜地殊勝却嫌僧近凡誰能一除洗更出萬嵌巖

蕃侍舅翁衡州史君游吉陽山舅翁舉往年與  
南澗韓公唱酬長短句蕃賦三詩

慘澹松圍障蜿蜒石隱龍背城無數里獻狀有千峰此  
地雖為寓茲山特未逢因公九日集臨眺得從容

聞道常年會尚書領客來公能哦舊句我恨闕初陪鬱  
鬱雲峯雨蒼蒼石磴苔人亡與節逝已矣兩裴回

出郭雨遽止下山雲復收人疑有神護神若為人謀敗  
壁淒涼句鄰家斷續謳明年回鴈上應憶此山頭

過黃狗步

古步經黃狗平沙隱白鷗順流翻逆浪欲去若苛留歷  
歷川原路蕭蕭風雨秋頽然怕看鏡白盡幾分頭

官池即事

偃薄雖茲驛相羊賴此亭鳥飛微破殼魚動暗衝萍豈  
但憂懷愜還能倦眼醒獨餘春草夢才盡不能靈

再題

既悟當寒雨仍知霧乃晴病軀聊自適閒望亦增明絮

落還將化荷新且解擎懷哉老將至沒世曷為名

山花有所謂繞壘漆者蓋縹絲藉此以取頭耳  
樹樹山礬落枝枝繞壘開論香寧敢輩取用實能皆白  
屋珍姚魏朱門賤草萊勿嫌卑薄域解產棟梁才

觀王文之所藏荆公帖

余行江左路曾涉蔣山椒野逸思乘蹇儀型想冠貂帖  
窺藏五世詩續詠前朝永日欣無數巾欵膝屢搖

周袁州惠建茶黑篤耨以四十字謝之

書齋憐寂寞書札慰荒涼勸把春風枕仍薰知見香未  
憂欺短褐寧慮厄枯腸塵思如能雪詩情或可昌

題畢叔文所藏趙祖文畫

數月湖山路未看湖上山塵埃苦相敗疾病亦多關見  
此微茫畫如行慘澹間小舟帆正飽何日載余還

書後湖集

我懷蘇養直不作漢三公隱墅人安在春溪草自豐遺  
文尚亡恙斯道未應窮會與吾尊友青燈話此翁



道傍菊一首奉呈安福丞公彭子壽

彼美東籬菊胡為官道傍蓬生雖翳翳秉色故煌煌風  
露與湔洗牛羊違踐傷未嗟愆節物終必在醫囊

溧陽道中懷秉文

不見水南梅春風已四回縱傳詩滿紙何似酒同杯已  
與修塗背還尋舊路來計期猶促迫到處勿徘徊

過餘干懷介庵呈其壻方景嚴

重過餘干縣長懷謫仙人猶如見顏色不復聽紛綸栗

里柳未倒桐鄉祠尚新遺文李漢在屬付斯無泯

新月甚佳方思明叔乃忽見過作此詩

出戶江山好入門風雨新荒涼如宅舍窘束是官身念  
子豈為遠能來端可人笑談殊未了催去阻重闌

宿龍鬚山

俯仰猶前日侵尋已半春行因累符檄來為閱松筠著  
脚盡可隱是身寧屬人雲泉混麋鹿冠劍上麒麟

密竹復踈竹老松仍穉松擔肩元近俗吟趣得深供要

宿招提景猶賒日暮鐘殷勤問鄰寺指點說前峯

六月一日始熱二首

雨後疑無暑晴來乃若焚  
汙渠工聚蚋閤室騰飛蚊  
憤憤妨書省岑岑似酒醺  
不知三伏久何以度朝暉

落日看籬脚晚風占樹頭  
庭荒雖若咫尺步遠亦頻周  
我老自投網民愚還坐囚  
相哀莫相釋點點更悠悠

同兒曹步月寺門作

溪風亂林影林月漾溪光  
宿鳥無安止飛鳥為斂芒  
兒

曹從杖屨老子廢杯觴誰謂時方暑端疑候已涼

對月

風清勝夏暑月薄借秋光坐覺還神觀心期隔帝鄉滿  
階蛩送感何許笛飛涼盤礴俄成久軒然睡倚牆

對月懷簋判丈兼簡文顯

季月風當凜南方候實偏長林未搖落頻夕對嬋娟恨  
我遙成隔知公夜不眠連牆有周子置論每超然

十四夜月

既夕風猶進凌空月故遲明宵縱當滿今夕可乖期少  
壯欣逢節年侵意自悲平生一杯酒即事五言詩

鏡破何年合珠沈幾日還空明歛溪石行列婺州山鴈  
泊宵仍警蟲哀夜不聞傳呼語舟子移櫂近前灣

十五夜月

老至自多感月圓仍此秋又成愁裏見都白幾分頭酒  
罄妨人醉詩窮不易搜徑歸掩關卧還雜候蟲幽

十六夜月

月早晝氛在月遲夜氣澄秋毫細可數烏鵲樓亦興青  
山龔李白蘇門隱孫登吾老無逸氣頽然照鬚髥

江月

江月照將夕江風吹欲霜殘書看莫盡病骨凜難當俯  
仰年齡邁飄零道路長豐年易圖飽何乃又殊方

秋日書懷

冉冉年將老冥冥雨送秋衡門想蕪沒蕭寺苦淹留工  
部詩陶寫平南酒拍浮九原如可作千載願同遊

留元衡須月上因抄賈元放舊詞併懷季承  
北客飄零恨南遊邂逅情幾年悲賦鵬萬里想騎鯨月  
已徐徐上雲能故故生吾曹重離合可問欲三更

雨後對月懷斯遠

早後雖逢月方憂未覺佳雨餘當委照此趣孰能加要  
覺湖邊宅遙知海上槎絕嗟同味少莫遣寸心遐

夜懷成父弟

晚蟬猶噪樹新月遂當天閔雨心雖切題詩思亦牽故

應聽撼撼殊愈對娟娟憶我章泉弟松牕竹屋邊

對月懷秉文

有此佳風月溪上更復奇山陰應接際赤壁誦歌時恨  
子不同載寫懷聊作詩平生三五夕咫尺又乖期

雨夜懷明叔併憶成父

放竹近軒牕地方中對床非貪起居適樂是話言長已  
解蕭騷味仍憂擺撼傷去君纔數驛憶弟更他鄉

懷公擇且問訊成父



山雨戴溪雲茅檐畫不分  
林花應掃地我友沉離羣  
數口饑寒累三生翰墨勤  
因聲問吾弟幾日定行云

懷成父

曉枕占乾鵲昏簷數濕螢  
竹風愁獨立山雨要同聽  
懶更翻黃卷還成倒濁瓶  
猶疑到或晚戒勿掩柴扃

月夜懷成父

尚缺佳已許既圓明  
若何一年增我老  
千里念渠多柳亂誰屢舞  
蟲喧空作歌要為終夕看  
四體奈煩病

夜月

曉枕厭蠅聲昏蟬復亂鳴耳根喧自合心地寂常生習  
氣存詩句平生愛月明鍾情在我輩安得到無情

中夜風雨驟作悵然有懷簡全真沅陵并寄成  
父弟

酒盡雲間月詩成雨至風支離如病鶴吟咏雜寒蟲撼  
撼朝梧葉蕭蕭瘦竹風飄零偶天末憔悴祇江東

驟雨

乍覺塵成斂旋聞土亦香溝渠勇飛濺竹樹返青蒼既  
使雷先戒還資風助狂未充田父望聊益病夫涼

分界鋪愛直驛張安國因杉製名而驛之前有  
老梅一株不知安國何為舍彼而取此也

杉自誰人種梅從何代栽腹空雷有擊根古土無培要  
是百年物曾經幾客來直哉雖見錄清矣可遺材

過潼川之飛鳥縣見餘干丞相題驛舍詩有感

次韻

道學元無偽標名徒爾勞孤忠天不管一死世尤高未  
洗邊庭血先焚董腹膏亂離元有自附壁為三號

舟行賦山中梅花

自與松筠並寧容草棘欺盈盈皆正色脈脈匪邪思照  
水初開處臨風欲墜時深幽殊可念酌酒侑之詩

鉛山道中懷故興化令賈元放故鬱林教授賈  
季承

駛雨更冷風長松十里中欲吟吟不盡將語語誰同賦

鵬人安在驂羸我欲窮枕流還泊泊幽夢恐難通

常山道中二首

發軔茅檐雨營炊野店煙春晴不難解客恨自多牽麥  
浪搖成湧梅飛去若仙畫中端有句詩裏亦安禪

晨征陰霧合晚泊霽光新聞鼓初非社逢耕政及春嗟  
余寄徑客羨爾受廛人有債成詩瘦無錢罷飲醇

夜宿沙渦

櫓折故難進牽殊深足虞百艱甘薄命共濟賴同途聚

落強名地并吞總是湖遙遙聞吠犬更問酒家酤

早過桐江與峽江甚近也

霧盡山容出風微水面平檝書重此役詩卷足平生船  
小炊無竈灘長去有程嘗評峽江似江水亦桐名

發永豐值雨投宿金仙寺明日還舊居雪大作  
雨暗投野寺雪明還舊居林園渾異昨門逕亦非初酒  
事難忘汝詩材不負余祇言冬大暖暖極竟何如

秋雨感懷

紅葉連峰雨黃花獨徑秋一杯聊復酒萬斛不堪愁短  
髮驚時晚修名怯歲道山中隱元豹江上失輕鷗

艤舟楊口叩居人以何時縛屋于此何時復去

云我乃鴈泊人戶冬來春乃去

戶戶魚蠻子年年鴈泊人生資持網罟遷徙逐冬春岸  
俗從渠變鄉鄰自我親殊勝倦游者渺渺愧風塵

寄秋懷

兩月巴陵郡搜詩朝暮間空能飲江水恨不上君山昔

者聞何至今馬興盡還才名或遭罵坎軻分低顏

大暑懼死暍祁寒愁仆僵歲時空卒卒身世益倥偬問  
服遺官歎懷沙去國傷終殊天何暮況事色斯翔

霞谷寧終計龍門已暮年向來嗟獨後今日可忘前既  
繆青衿學當思白首傳猶須就吾子相為語蟬連

我不識來父聞之空有年曾題五字寄僅以尺書旋諸  
老沒已久故家誰復賢猶欣得吾子句法早親傳

西京劉校尉上疏引春秋聖學期深探明時可妄授他



年王子表今日古人求幸甚聞無恙頓能寬遠憂  
吾與徐斯遠敬之寧獨親詎須勞咄咄徒覺歎跋跋共  
樂名教地同耕寂寞濱敝裘堪共御宜爾耐艱辛

幾欲相酬答詩情了不關攜從五溪遠直過洞庭寬歎  
我終成累多君不可刪黃昏佇立久雲盡覺無山

憶我江東弟書來得暫怡寺居因市近村舍與貧宜兒  
輩詩書力童奴薪水為尤欲護吾竹及此夏初時

求友詠伐木思兄言陟岡那知符檄累不了道途忙照

水形知瘵臨風髮又長想渠能我憶如我不渠忘  
兩載沅湘役雖勞何所為蝦行仍蛭渡猶豫復狐疑孰  
念鉏犁把殊勝手板持山南與山北舍子更從誰

真游覓唐德興題詩不見有懷其人八首

險絕辰州路曾聞一再行看巖有畱句捫石欠題名四  
世斯文事平生一壑情何當從此去感念在先生  
雨後林園合風前裘褐輕當游元不惡有士與同行定  
識田中趣殊勝俗裏情誰過江驛靜日聽筍興聲

月上侵衣薄風來颯鬢秋有觴寬偈仄無意計沈浮誰  
念千山底深懷二老游更闌竟忘寢詩就不成謳

幾歲天台住今年鴈蕩遊心期在康樂人謂作監州騎  
從真能屏煙霞定賞幽他時期一訪好為著詩留

時論歸臺閣交情異笠車不甘腰為折寧使鬢成華莽  
莽湖之北悠悠海一涯銅魚偶逢使書寄阿戎家

一紙日邊裁千山徼外開所同惟甲子絕異是人才學  
問須傳授君家有自來嗟余獨何者道阻乃從回

相從寧見樂相別乃知悲  
況辱平生友而堅晚歲期  
已醒臨別酒還讀送行詩  
何況維舟處蒼然暮色時  
去矣不為難山長水又寬  
未曾搖短棹已自失危欄  
厚意煩三友相要下急灘  
雖然賒執手顧免別辭酸

與成父別後有懷

何物催衰白頻年屢別離  
弟兄俱老境搖落況秋時  
汝水應余憶袁江獨爾思  
不堪行似棘更對雨如絲

懷明叔三首

結交不在早傾蓋有餘歡愧比陳蕃榻猶吾陋巷簞新  
來幾日別無計百憂寬世俗輕交態相期在歲寒  
紛紛閱投刺往往盡冠儒歲晚見松柏火炎知硤硤寒  
廳憐我獨玉趾賴君迂政爾如修竹何能一日無  
微風吹甚清缺月照同盈盤礴得露坐喧闐嫌市聲何  
勝憶玄度底處覓彌明念我筠牕底蕭然榻正橫

懷王彥博徐審知

遮眼文書倦可人親友賒雨踈無更有鴉斷直還斜兩

金史曰人言  
卷二  
鬢寧禁白餘生孰可涯  
闕余三作徑愧爾五其車

再見晦菴既行有懷

已別重成見重來  
那得長順流  
聽瀼瀼冷日對荒荒  
既歷冰霜至還憂雨露零  
去畱俱有念搔首漫彷徨

懷靈山呈元衡

故人移住遠明月掛簷  
遲誰復相過語何從  
更覓詩白頭甘斗食青眼望羣兒  
想見靈山閣雲峰夏愈奇

懷伯謨

為憶牕間句思從物外人白雲空在望青眼為誰新一  
別已數載再來還幾晨期君歸對策過我莫嫌貧

懷秉文

稍過湖頭路臨流但遠林打篷知雨急蕩槳覺溪深紅  
葉專秋色青銅慨古心平生學詩友兩地復離襟

夜坐懷李季蓬

舊誦凌雲賦新哦泣鬼詩結交何用早傾蓋許深期捷  
徑看君絕長途覺我衰殷勤今夜月全似過橋時

過曾季永見壁間張安國所書天下第一真仙  
之巖知有融州便託附賈季承書作二詩呈季  
永且懷季承

見井渴已止投林心更欣行方觸炎熱坐覺遠塵紛誰  
滿鵲鷺集子猶麋鹿羣融州在何處壁字帶巖雲

不見融州使無從可寄書仙巖忽逢字驛騎想非疎室  
近宜人桂官勝衝尹驢江南熱猶劇嶺外比何如

至豐城懷溫叟叔異南秀欲題之叔異曲江磯



之庵已蕪甚矣重增太息

浩浩寒流急蕭蕭落木高江山故雙劍人物欠三豪客  
意已愁絕風聲仍怒號相思意無極佇立首頻搔

送文叔入都兼簡陳元齡周畏知文叔之弟華  
叔

叔夜雖逃懶元龍政坐豪清談盡名理老句逼風騷才  
大端難屈時平敢自高驂騑合鸞輅斥鷃祇蓬蒿

落落初寮裔英英桐樹孫科雖分進士官亦到詞垣

王嘉

吏韓無咎皆以無出身人作中書舍人

近例皆如此茲行不在言故人誰

健在為我謝陳蕃

松谷門無鎖迂齋席有塵

文叔所居松谷自號迂齋

山林從寡伴臺

閣政須人才識思難弟儀型想伯仁諸公皆衮衮老子自跋跋

懷李商叟

舊隱屏風疊而今半在村作詩傳正派對客理清言我  
埽山中屋君開竹下軒風流要還往一葉任溪喧

好在半村宅竹添桐長枝空餘相憶夢不見寄來詩苦  
節君耆舊卑官我判司因來貴溪水一為洗塵緇

懷謝子暢

中年非畏別我輩自情鍾慘澹千山雨淒涼四壁蛩有  
詩因悶得無酒似愁濃未說扶攜去猶期一再逢

寄處州李侍御二首

自聞開幕府幾欲走郵筒便有江湖役仍遭貧病攻想  
多為郡樂亦復賦詩工又最淮陽課何時用弱翁

已上湘祠請猶須漢臘期側聽惟此雁發興在南枝貧  
已長年事官寧向老為舊聞煙雨觀猶擬和公詩

送處州斯遠二首

孰有如公者蘄州又處州時人得稱誦氓俗記君侯吏  
有循良擇官無內外憂願將田里事一一奏前旒  
珍重徐斯遠茲行豈漫遊過江探禹穴下水到嚴州損  
益觀其友淵源問所由我居如有繫君去莫能畱

送張王叔孝曾二首

難弟詩初和難兄蓋復傾時方論名位公獨叙交情八座使邊節舍人垂世名用之俱未盡袞袞省公卿

接壤渠陽郡咸歌別駕賢薦書曾列上除日聽爭傳水疾山危處風高木落邊栖栖憐倦客渺渺送歸舫

去冬十二月與成父分袂於上饒春見於漂陽又見於臨安成父竟先言歸作是詩以送之

客裏凡重見天涯竟獨歸急難徒眷眷離別倍依依夏木青圍幄春流綠染衣與俱端不惡吾事成成遲

送沈善昌朝沅陵之子

論契繇先世言交自迺翁俱成落湖外每恨隔湘中得  
見無幾見願同終罕同如聞工賦好無或嗜詩窮

送鮑必達兼寄章季亨

人物稱夷白星文仰少微常云馬羣盡乃得鴈行飛天  
外一再見客中先後歸因行謝章子別久頓書稀

送唐信州

立朝因事去治郡乞身歸世議無公是人情有獨非陶

潛深避俗張翰早知幾試問還家樂娛親只綵衣

送陳監獄參告宜春

不見存齋老風流尚竹林一官香火吏五字短長吟快  
閣鷗鷺渚仰山鐘磬音何當同蠟屐不用動離襟

送徐茂叔游宋衡

譽自賢關得才由治劇新諸公共推轂此去各通津歎  
我年猶弟如何鬢總銀非關缺為別愁絕恐傷神

送邢大聲宏音二首

客裏送行人情鍾沉所親絮飄吟帽雪花雜馬蹄塵何處為寒食還家尚及春園林檢校事欠酒著詩陳

兄洒不入

吾

不獨論新昏晏晁原老親見來能幾日別去忽今晨聖代無遷賈明時豈避秦長沙武陵地行樂異傷神

送徐季純

觸目偽耶真先生金玉人須知託交契不特為情親謁告歸何遽連環夢豈頻還家已春服綵戲不妨新



寄送潘文叔恭叔二首

夏潦方為問秋風又枉書寒溫叙安否學問叩何如班  
鬢驚催老青衿悔負初朝聞夕可死何敢廢居諸

已道衡州遠而今又廣州壩簾君膝下風雨我蠻陬至  
矣貧而樂誰云富可求斯文失張呂吾道屬朱劉

恭叔書來

及朱劉二  
先生動靜

送張交代琮

歷數盱江士推君父子間夷途有霄漢蹇步乃荆蠻薦

牘方爭上交情勿重攀無緣更州縣小試亦編刪

寄送于去非三首

三載尉雖卑諸公競已知薦書常沓至賓幕每牢辭  
玉立風神峻河傾議論馳他年繼質肅應有後人祠

草木政怒長波濤方疾流雄辭雜蛟虬健筆走龍虬  
我句平無取君才勇莫儔如何晦翁語折節繼前修

假館我多暇驅車君苦忙近時成契濶遠去益淒涼  
聞說催歸騎何由把別觴歸心擢章貢遠目溯沅湘

章貢水過

豐城  
縣下

送劉伯瑞四首

長懷遠齋老贈我五言城世上幾朋友吳中君弟兄頻  
年欣再見南走悵東征情話悅親友交情見死生

遠齋無恙日酬唱幾多詩杜集容今附韓門見昔師青  
雲雖益顯種髮欲奚為更欲求餘本流傳海內知

居者與仕者所知張宋間咸能謂君好政欲警余頑論  
已窮千載才寧減二班何當傳副本免使訪名山

衡州有賢牧吾黨更監州事作鹽梅濟殊非涇渭流斯  
民均受賜治狀各推優看即蓬山上聯翩兩校讐

送李仲詩二首

武陵曾遠客主簿作南征緬想經行地猶含賦詠情故  
人如見問白髮欲千莖卻記相逢日回頭歲月驚

今代知名士君家萃一門不惟文獻在政是典刑存臺  
閣期平步沅湘莫斷魂平生翰墨事茲可壯其源

送周袁州赴鎮三首

百里更題輿纔分刺史符循良重他選途轍詎常拘不

但治文牘

江西一道事多決之

要令歌袴襦戚休顰笑裏無或謂

民愚

家住青源下宜春起作州風聲故習熟治政得優游意  
見寧當出江山自足畱端能不嫌客準擬繫歸舟

世亂離鄉里愚生後老成契篤馮翊幕親叙潁川盟薄  
厚寧同俗死生無異情一枝殊未穩何日息飛鳴

送晁元默自潭還撫二首

臨汝差池再長沙邂逅初飄零渠念我畱滯我嗟渠盤  
礴雖云久追隨固若疎未知從此別後會復何如

畱落悲遺俗淒涼說故家文科君有繼世業我空嗟白  
髮時今晚青雲去未賒還家語歸父穠菴要功加

送潘元壽

喪亂違初載飄零得晚交薰蒸厭糟麴塵土困榜敲折  
柳分青帶贈蘭開紫苞君行過懷玉下有我衡茅

送晁舅翁子應過寧鄉謁令李思求

藉藉滿山寺堂堂忠獻墳幽光發泉石義氣慘風雲文  
舅雅能賦令君深好文懸知契談麈不待對爐熏

九月五日具草酌同彥博審知成父集於晉寧  
山半之亭作詩二首

探支重九日試手菊花斟論置人繁寡觴行自淺深風  
能度林杪月亦吐山陰四聽蟲仍起中還著我吟

平生羞狗監何啻失羊斟與子風期尚相要林壑深分  
甘駒在谷寧事鶴鳴陰此日胡為樂詩成改又吟

九日有感

寥落淵明後淒涼九日期尋花漫青蘂對酒祇空巵林  
密棲鴉早江寒泊雁遲樓高無那倚絃絕有誰知

九日懷周仲材

吹帽今朝是登高舊俗同窮鄉怕逢節病骨怯臨風此  
日千憂裏他時一夢中白衣殊不至空遠菊籬東

九月十三日雪

稍稍雲初集泠泠風未停粗能成點綴還是學飄零徑



路高低滑炊煙遠近青籃輿所經歷詩語費平亭

雪中四詩

歲既遭連旱天恩錫屢豐匪霜伊作雪因燠遂成風信  
豈朝夕際誰云反覆中寒廳苦無事冷語却慚工  
茅簷元未覺竹瓦偶先知被冷渾忘寐牕明得屢窺雞  
鳴因誤早犬吠極驚疑我亦胡為者侵寒要索詩

慨念耕田吏遙憐射獵翁追蹤盡狐兔遺種絕螟蟲試  
問南山廣何如渤海龔無矜沒矢力要格帶牛風

疫癘潛攘卻埃氛一洗蘇相看即陽復何必待儺驅未  
暇議新水且同歌袴襦有年如再得卒歲可無虞

雪後二首

幽徑朝披雪寒村晚對晴眼邊多意屬詩裏欠天成一  
官猶賒祿多田肯借耕鄰家競春務客子動羈情

麥茁猶藏綠梅苞尚掩紅祇言晴作病何意雪爭功擁  
褐朝慵起扶藜晚漸通林行語鴉舅溪立漾鳬翁

對雪有懷

頗怪風能急還疑雨不成疎疎聞夜半璀璨及天明安  
否妻子念乖離兄弟情誰令負湖海政使落蠻荆

雪後三首

松竹夜枕聽窓扉朝起看雖成見曉喜敢廢履冰難照  
映形知穢噓呵詩故寒要能窮極覽安得振飛翰  
陰巘猶施白朝林已沐青墜烏飛蔌蔌射日聚熒熒使  
恐歸無迹聊須記所經耳聲并目色佳處若為形

一雪宜戲我頓晴還起予寺逢東野古梅誤北枝疎發

興清無極深行畫不如冰泥漸融釋却恐汚衣裾

十二月二十九日雪三首

歲是明朝盡春猶半月遲人言無復雪天意肯違時宿  
麥爭萌達遺蝗絕類滋年豐如可待吾豈病長飢  
犬吠非因盜鷄鳴已後晨穿窓殘月在布地落花勻我  
亦驚霜鬢誰能念曲身久晴常畏病逢雪更憂貧

蔽天纔集雨動地忽驚風  
芡絮潛加力盃觴稍費功  
山川相映發竹樹失青蔥  
幼質知難久茅檐溜已通

二十八日雪二十九日未已賦詩凡五首

霰集瓦跳鳴風橫窓竹聲陰來由有漸落地勢難平龍  
具愁終夜鶉衣起遲明兒時故狂甚老境只寒生

臘裏逢三白詩中得數書書生真有癖習氣果難除更  
上高樓望聊將遠目舒天災如可弭凍死未憂余

舊褐猶堪著晨炊不待營江磯有漁者山徑亦樵行爾  
勿資間詠渠應甚苦生還家對妻子半菽與藜羹

戶戶薪充續家家爐作牀懸知火明暗是繫體炎涼為

俗陋至此斯民真可傷  
詔條先勸課王政本耕桑  
夜久寂無聽曉來微有聲  
鷄鳴疑遠望鼓動忽孤城  
異縣畱妻子殊方老弟兄  
懷哉一斗粟於汝豈無情

教授以憶梅韻賦雪詩蕃同之五首

窮巷朝仍擁寒廳午未開  
人誰送酒直鴉為致薪材已  
倦除頭垢寧能拭硯埃  
高情蒙枉記好句數能來

平地疑無地知時復過時  
梅花遍南嶠雪嶺亘西陲  
免狡猶迷窟禽偏詎立枝  
推顏如我者蕭瑟欲胡為

俸薄愁斯立，鏡長困拾遺。  
經營將有賦，零落不成思。  
凍結鬚頭折，煙凝袂半緇。  
陽春竟何在，卒歲以為期。

窈窕緣江路，幽深隔岸祠。  
為梅期載酒，因雪重賡詩。  
儻匪相娛樂，疇能遣歲時。  
出門方積凍，散策待晴曦。

賸有騎驢興，終成閉戶居。  
江山峙書閣，松竹隱僧廬。  
但遣官成集，莫言丞負余。  
可於風雪際，頓使唱酬疎。

來詩有近

日詩卷頓  
疎之數

次韻簽判文喜雪二首

雲蔽初疑雨，雲開復似晴。北風何自起，南雪驟能成。  
氛應無作東郊者，有耕怨咨懷往咎。驩喜見今情。

鬢非絲，素白顏。是酒爭紅，獻瑞吾無與。哦詩且課功，要

攜藜杖出，安得凍泥通事已空梁。苑公今亦醉翁。

事見坡公

聚星堂  
雪詩

初四日妍暖如春

薄雪未滿早，苦晴翻劇喧。長林無悴色，幽鳥亦多言。  
縱喜春當復，還憂病作煩。梅花慙驛使，芳草望王孫。



五言長律

春雪四首

旱歷三時久荒成此歲連祇疑吾邑爾復道數州然慄  
慄溝虞墜嗷嗷釜苦懸縣官深惻怛長吏闕流宣賑米  
多虛上蠲租豈盡捐處心誠昧已受賞更欺天敢謂皆  
如此其間蓋有賢大江分左右萬口說朱錢

謂南康朱  
熹元晦使

君江西錢佃  
仲耕運使

隴麥出尚短畦蔬栽未勻既饑還苦饉度臘復當春往

者雖深念天乎本至仁忽來風不斷遂俾雪無垠撼撼  
初兼霰霏霏且蔽塵田家欣鼓舞客子敢輦呻破衲深  
跼夜生薪急燎晨無從漉醅舊聊且賦詩新

喔喔鷄啼豎信信犬吠村遇樵微有路因汲半開門老  
子將停軌輿人請載犇詰朝如未已兀坐復奚論我亦  
貪奇觀行因用汝言既孤裘坐擁寧憚筆時援柳絮憎  
陳語梅花憶故園凍髭真易折皴手詎能溫

天外難摹境眼中無數詩未能憂凍死真復是狂癡不

廢書深映究同驢借騎高低酒價問遠近佛廬知要學  
禁體物良由多愛奇悠悠竟何得役役漫成疑有弟歸  
先我因渠屬有思王徐吾畏友印幼所嬌兒

次韻何叔信雪夜

夏日苦炎熱秋風灑靜便一年還欲盡萬事不如前觸  
目長昏霧憂心抵瘴煙詩人吁養鬼烈士悵飛鳶本意  
多閒暇何為亦糾纏陰風聽門壯積雪見山巔蠟屐遙  
思著荷衣猛欲牽當君開卷讀是我枕書眠酬唱何寥

落乖違易歲年亦為當有賦枉贈忽同然

雪初作懷成父弟及諸子

歲事方虞旱山行敢願晴  
雨花纔若灑氷霰忽如傾  
孤役寧私已羣生足慰情  
泉源滋久竭隴畝動深耕  
冷落三家住凌兢獨木橫  
暫從求束縕還是問前征  
凍雀成頻墜荒鷄誤曉鳴  
憶兒衣孰挽懷弟艇猶撐  
便可鉏三徑因之治短檠  
豐年今可必與汝沃藜羹

雪中懷成父

只道渾無雪那知待得春人情聊自慰造物信如神凶  
旱拘常數乾坤本至仁麥遲猶可種米賤況多陳問我  
官居趣還如宿昔貧未能憂簿領長苦計芻薪對此得  
無感慨然成久嚮更聞江左弟仍困甌中塵

雪

動地風初作披空雪遽鋪幽能吐山岳遠至卷江湖藹  
藹纔迷屋紛紛遂塞途月疑常掛曉日為不成晡徙倚  
詩難狀憑陵酒易無近人憎犬躍在野想鷹呼勢重微

推壓滋深快洗蘇當憂竹栢折且救蕙蘭枯  
順喜遵時令寒寧恤貧軀年豐物無癘此外亦何須

奉送純父元之昆仲

春江足風雨雨裏送江行黃綬我白下絃歌翁武城題  
輿適茲地捧檄重相并邂逅得兄弟從遊成友生臨分  
皆有贈雖病可忘情中壘經窮旨建安詩著名絕知傳  
世遠可但決科榮江右連江左相期茂厥聲

見月有懷

中秋不數日明月未頻看  
向晚雲無滓初宵露未團  
幽但庭內渺渺屬河干地  
迴空無蔽灘長靜不湍巴  
童挈小艇漁父舉長竿墨  
本句中畫詩工珠在盤莫  
親談矻矻空復夜漫漫客  
枕成疲卧書窓記讀殘

四月十五日發岳州

獄事生人繫使臣王命將  
移官乏童馬泛宅恃舟航  
浩沅湘疾滔滔孟夏長妻  
孥累微祿盜賊幸空囊水  
驛纔容借風帆又趣張誰  
與可尤怨政爾賦行藏

送張王臣

邂逅高標識漂流仁里依君為鄂渚去我亦鼎州歸風  
月情何已江湖便苦稀政嗟書莫數忽喜塵重揮論事  
多驚俗談詩每造微方能以文會遽復攬征衣常伯麒麟  
像詞垣驚驚飛官今沉京秩名且達天扉天馬當雲  
路沙鷗合釣磯無庸問車笠要不負羈鞅

送唐德輿

國朝唐與蘇不數漢相如繼彼二季後當茲三世餘青



雲曾給札班鬢尚題興古義惟知學時人或謂踈鄭虔  
歸繫馬阮籍倒乘驢日月且逝矣賢才終舍諸何遲問  
安在可使賦歸歟直自枉渚宿還過彭蠡瀦岷江飲鄉  
水廬阜訪林居翰墨深懷趣登臨想盡據峴山孤湛輩  
栗里羨宣舒執友半廊廟先生寧里閭家聲紅藥看人  
望玉堂廬計日豈偃薄匪朝應詔除公其作鳴鳳我自  
伴春鋤

章泉稿卷二